

焦太史編輯國朝獻徵錄

熙太史編輯國朝獻徵錄卷之二十七目錄

南京吏部

尚書

黃宗載

魏驥

曹義

崔恭

錢溥

陳俊

王俱

楊守陞

黃珣

王華

孫需

朱希周

吳一鵬

張潤

吳嶽

王本固

侍郎

范理

王克復

李旻

羅玘

儲瓘

林文俊

郎中

莊杲

鄭繼之

新安黃之采

全校

吳興茅元儀

焦太史編輯國朝獻徵錄卷之二十七目錄終

焦太史編輯國朝獻徵錄卷之二十七

南京吏部

尚書

資政大夫南京吏部尚書豐城黃公宗載神道

碑

王直

宣德十年 今天子嗣大寶位臨萬邦顧南京根本  
重地建置百司而吏部爲之首宜得謹厚大臣往繼  
之九月以命吏部左侍郎黃公宗載辭之日詔進爲  
尚書以行士大夫知公者莫不舉嘆以爲宜在南京  
八年以老疾求致仕 上初不許章四上乃許之歸

豐城故第又幾年年七十九以疾終訃聞命禮部致祭工部爲治墳塋明年十二月廿一日葬於其鄉梨樹岡之原葬已其子儒凱來謝恩闕下詣予敗且泣曰先考之葬朝廷寵終之禮厚矣於例得樹碑神道而未有文敢以請予少於公而辱交已久誼不可辭黃氏於豐城爲大家公曾祖仲軒有隱德祖以仁考子貞以公貴俱贈吏部侍郎進尚書妣皆贈淑人進夫人妻余氏亦累封至夫人公自幼喜學年十五已能爲里塾師爲郡庠弟子從熊伯機受春秋遂取進士爲行人謹於自治奉使四方未嘗受饋遺屢左右

司副爲司正以父憂去治喪無違禮不飲酒食肉者  
三年服除領舊職永樂癸未以賢舉授湖廣按察司  
僉事時湖廣諸道惟銅鼓五開最難治分巡刷卷者  
多憚行蓋天下巨姦宿猾皆謫戍其間善舞文弄法  
與事撓官府而陰把持其短長往者欲稍按治卽糾  
結如沐漆不解欲一切漫漶則見嗤無可柰何多避  
不肯往公至當刷卷卽毅然治行到武陵問風俗知  
其人苦於從軍女子惡爲軍婦不果嫁男子則慮婦  
家往從戍而以徭賦累已不果娶至年三四十猶獨  
處公召鄉老里正諭人道大端俾轉相告語務嫁娶

以時不踰月成婚姻者三百餘家他縣聞風皆樂從俗爲之變乃榜諭銅鼓五開諸姦豪數其罪惡且發其善端曰不改必真之法衆知公務以德化人皆相戒勿犯比至莫有干於理者丙戌徵詣文淵閣修永樂大典書成受賞而歸戊子朝廷以海運糧餉赴北京下湖廣造海船四十九命擇風憲官之賢且能者泄其事衆議以屬公而工部所遣官務苛察生事將聞於上以銜能公鎮之以靜消其毒整而落其機牙得不擾而成功己丑車駕將北征遣都指揮吳玉徵兵湖廣玉貪暴失期上謂按察司官不糾劾於是公

與同僚皆坐累謫楊青驛公處之如平時遣一力受  
役而躬自執爨未嘗有不豫暇則閱書史以吟咏自  
娛癸巳復起爲山東道監察御史侃侃自持不肯少  
貶以徇俗乙未上親策士於廷時鴻臚無卿丞張  
斌任事恃城守功最狠戾多所中傷人頗憚之以不  
與讀卷至爭論上前不已公奏斌不學無識不可以  
讀卷乃取煩瀆聖德如此當伏法士論壯之丙申  
命巡按交趾交趾城中諸軍管房覆以茅故多火公  
廉知軍民歲歲伐材陶瓦備官用然皆資權豪命三  
司慢官稽其數比有取者皆著於籍由是無敢私費



不半年管房皆易以瓦覆火患遂息時工部尚書東萊黃公福掌交趾藩憲二司才行過人而不事邊幅御史往者多庸常視之至公獨恂恂恭讓而法亦不廢及歸行李蕭然無交趾一物東萊嘗語人曰吾久居此所接御史多矣唯宗載知大體己亥丁祖母憂居家有旨奪情授貴州道監察御史益謹禮蹈義遇事必究極是非不曲隨苟止於禍福利害不計也故再陷刑辟而賴公道以免甲辰宣宗皇帝正位東官妙選官僚職輔導擢詹事府丞未幾陞行在吏部右侍郎時少師蹇公猶兼領吏部事多倚公公協力

一心進退人才必準公論不苟爲異同故一時號得人  
洪熙元年賜誥命制詞有清潔平恕恭謹厚重之  
褒是年遣祀夏禹及南鎮會稽山因賜鈔八百錠俾  
歸焚黃於墓下其後嘗奉命往浙江理軍政及伐官  
殿大材於湖湘設施措置舉不失宜故事集而民不  
告勞久之遂有南京之命蓋上知其老而欲安之  
也南京雖無銓選之勞而勞於馭吏蓋其人多邪巧  
才見害必避見利必趨往往冒法以僥倖公正已率  
物無少回撓屹然如泰山喬嶽不可撼陰陽闔闢風  
雲雷雨以榮悴百物而細大不遺其施博矣已未進

隋資政大夫詞曰寬和有執廉靜自持又曰小心與  
職始終不渝人以爲實錄當是時公卿大夫蓄德之  
盛莫如公及致仕而歸猶康強無恙士大夫出餞都  
門外瞻望咨嗟漢之疏傳不過也公旣孝於親篤於  
二兄仲氏宗曼有孫孤承裔貧苦不能自立公命其  
子文凱儒凱牧養之文凱先卒獨儒凱繼其家及公  
歸卽爲承裔治居室使仍守舊業毋廢墜其施於鄉  
族細行之美尤多茲不載姑序次其大者

南京吏部尚書魏驥

實錄

元年  
御史  
物本  
常博  
士

魏驥字仲房浙江蕭山縣人由乙榜授松江府學訓導善於教人以身先之諸生多有成就與修永樂大典吏部尚書師達薦陞太常寺博士文廟謂達曰

劉履節九年御史我皇考方授以此職不輕以與

人也宣德初陞考功員外郎歷陞太常少卿試行在吏部左侍郎尋實授驥端慎廉約雅有德望正統中雖太監王振蔑視士大夫於驥亦禮重之值畿內蝗本勅巡視問民疾苦既而以老辭調禮部復辭改南京吏部以優待之戊辰進尚書屢請老不許景泰改

元始得請致仕年已七十七矣驥好學老而不倦家居餘二十年不別治生惟以文學自娛天順甲申詔進階榮祿大夫成化辛卯監察御史梁昉請特加優禮上爲之遣行人持勅存問賜以羊酒月給米三石勅未至以先卒時年九十八時成化八年正月卒之日神爽不亂盥漱就枕倏然而逝遺書戒其子鴻臚序班完慎勿以葬事擾鄉里賜諡文靖論者謂自古大臣之最壽者惟宋文彥博而驥年死之尤高蓋古今罕有云

魏文靖公驥讀書山寺中見一毒蛇方化驚惡而避之俄有漁者捕之以去公懼傷人追買棄之貸僧錢以償既以博士起家累官吏部侍郎奉命往南都考察京官舍官舍止携一蒼頭歷年所積俸貲攜之不可歸之無人乃召同鄉同年子官刑曹郎者付之其人請封諭公佛然曰後生輩何待前輩薄乎其人不敢復言時有子壻從官舍如其輕重歎識爲偽銀而盡盜其真者比公南都竣事歸出俸銀令銀工碎之則偽也公意部司之弊嘆曰近來官員無良一至是乎乃又出柴薪銀猶夫偽也銀工私於蒼頭曰昔

有某官舍人嘗爲此物出自予手將無是乎蒼頭以告公戒之曰慎勿洩彼將不安矣寧亡金可使失權乎已而刑曹郎陞辰州知府請教於公公曰君練事體又精刑名何郡之足爲第須勅舍中雖至親不可忘防檢刑曹郎恒念其語不置已舍中人稍稍露其事辰州入覲乃攜其俸入盡數以償公駭曰君誤矣柰何以不明跡加人不避乎予銀具在未有以爲易者迄不受比以南京太宰致仕歸晨夕田間布衣芒履首竹笠以課傭作與野叟雜處不少崖異云

南京吏部尚書曹義傳

曹義字子宜應天府句容縣人自幼疑重穎敏父奇愛之異於諸子遣爲邑庠生誨之曰吾家世業儒汝事學毋怠以底於成庶幾無忝家世業克邁乃訓委已爲學旣丁母夫人經氏憂服闋見同門多成就遂奮志詩書晝則閉戶夜則隱燈于帳以讀雖隆冬盛暑不少懈永樂九年以書經中應天府鄉試卒業大學遇成祖文皇帝選入翰林讀書於是益自淬礪肆力于文學登永樂乙未陳循榜進士尋改爲庶吉士先是宅旁有一背井殆百餘年泉湧出鄉人以爲



是義之興云歲戊戌授翰林編修丁母吳氏憂喪制

未終 詔奪情蒞職秩滿轉禮部儀制司主事仍直

翰林未幾丁父憂服闋還官宣德乙卯陞吏部文選

司員外郎自是始離翰林而專職全曹矣正統癸亥

知者薦爲浙江叅政 上特留之明年陞文選郎中

又明年陞吏部右侍郎士大夫相慶以爲得人義盡

心率職品量人物鮮有不當時泰和王直爲尚書以

義精選法凡黜陟賢否一以托之然義事王甚謹於

事可否非經咨決不輒行以故王待之益厚且密嘗

謂人曰曹公端人也己巳秋北虜犯京師奉 勅提

督官軍守衛正陽崇文二門晝夜不遑寧處者凡十  
餘日防範嚴謹虜避不敢近尋轉左侍郎時當多事  
之秋屢有建白其見諸施行者人用悅服景泰改元  
陞南京吏部尚書三載 賜誥進階資德大夫天順  
紀元年七十有二捧賀表自南京至 上念義累朝  
舊臣而年且老特賜致仕 賜璽書有典選著公平  
之譽議事有忠讜之言之褒家居四年而卒義寬厚  
周慎不與物忤人有過必導以異言不事訐直居官  
行已一以忠勤謙慎為本不矯飾以取名譽外若渾  
涵而中有定見少師楊士奇素不輕接人然最愛重

之學與商論人物別白賢否必據其實有不備者及  
不巳楊樂從之尤篤於友義編修邢譽卒而家甚  
貧哭之盡哀且買棺殮之并聘以白金其子鴻臚序  
班純聘而未娶復助首飾衣服以成之吳人沈義係  
內親家日衰薄有女四各爲具粧奩嫁之其一隣有  
竊其屋後木植者家人踪跡知之且詬且索乃止之  
曰彼乏用故取之勿再言也其仁厚不校類如此治  
家甚嚴訓子姓亦必以正道子寬爲中書舍人兄子  
景第進士爲監察御史每誨景及寬以務忠孝慎交  
際且曰爲人宜寡嗜欲立心宜以不欺爲主慎勿營

奢侈夸誕也吾平生無過人者惟此心不欺物不暴  
殄耳及致仕家居悉屏世務於屋東開地種竹鑿池  
畜魚構一亭於池上其旁雜植以花果題曰怡老日  
與騷人墨客飲酒賦詩以爲樂識者慕其有高致云  
卒年七十有六所著詩文有默菴集藏于家

南京吏部尚書崔恭

崔恭字克讓直隸廣宗縣人正統丙辰進士擢戶部主事用薦知山東萊州府事萊地瀕海號難治恭撫馭有法惠愛爲多居六年民歌頌之以漢楊震爲比蓋震嘗刺是郡也景泰中陞湖廣右布政轉江西左布政天順初進都察院左副都御史巡撫蘇松等府遷吏部左侍郎陞尚書以母喪去位服除改南京吏部首黜諸司不舉職者數人以正吏治尋奉勅參贊南京機務凡政令必與二三同事論定而後行兩以疾乞致仕不許於後再乞乃許之成化十五年十二

月卒年七十一訃聞贈太子少保謚莊敏賜葬祭宜  
其子璿爲中書舍人恭和厚坦夷靖恭自守遇人不  
爲矯飾而是非臧否未嘗不公臨事惟求合理便民  
雖難不避其爲政知大體愛惜人才尤親善類卒之  
日遠近聞之莫不悼惜亦一時之名臣云

南京吏部尚書錢公溥

松江府志

錢溥字原溥華亭人正統己未擢進士試高微露詩  
稱旨命教內書館授翰林檢討擢春坊左贊善仍  
兼檢討修寰宇通志成陞左諭德兼編修天順丁丑  
改尚寶司少卿陞侍讀學士賜二品服充東宮講讀  
官壬午奉使安南國賜一品服甲申坐內侍王倫事

詳見溥  
歸榮集

出知廣東順德縣成化丙戌復故官閒住癸

巳起掌南京翰林院事秩滿赴京擢南京吏部左侍  
郎己亥入賀聖節尋乞歸命以本部尚書致仕補  
一子爲國子生丁未進階榮祿大夫再補一子國子

生弘治戊申五月卒年八十一賜諡文通溥少有文  
名既擢第聲譽勃起嘗上書楊文貞公論學文貞避  
之居父憂與巡撫周文襄公論便民條約復移書侍  
郎李公論積荒召佃煎鹽水次倉四事多見施行在  
順德釋繫囚撫流民尤多善政 英宗復位大臣多  
受賞溥言於兵部尚書陳汝言曰當時非 皇太后  
手詔則曹石二人焉敢提兵入禁宜以功歸諸 太  
后上尊號爲宜汝言入言之 上卽舉行已而問知  
出於溥也故有學士之命使安南與禮部論移文不  
當與內臣同行禮又與內臣書論 詔勅開讀先後



之序至安南與王諭郊迎禮儀王辭屈悉從之瀕行  
賚以金不受至遣陪臣入 奏乃以 上命受之時  
以爲得體前後五典文衡門生滿天下文章瞻蔚至  
老猶不衰四方求請者相屬名山靈境鐫刻殆遍尤  
善交際見者無貴賤皆得其歡心故人尤傾慕之  
有太監王倫者嘗受業於溥當 英廟大漸時倫出  
就溥舍妄談政事人物被絀訪下獄罪且不測有左  
右之者乃得從輕典其出爲知縣以此

資政大夫太子少保南京吏部尚書謚康懿陳

公俊墓志銘

王 儼

弘治元年二月太子少保南京吏部尚書致仕莆田  
陳公以疾終於家訃聞命加卹典諭祭以文塋葬以  
式而以康懿易名可謂盛矣公諱俊字時英別號愚  
菴自幼聰警不凡長遊郡庠治書經正統丁卯中福  
建第一人明年中進士第授戶部主事累遷員外郎  
郎中成化乙酉陞南京太常少卿戊子召爲戶部右  
侍郎癸巳改吏部乙未陞左侍郎丁酉滿九載拜南  
京戶部尚書庚子奉勅改兵部參贊機務甲辰轉吏

部丙午陞尚書九載滿赴闕 上嘉勞之賜以羊酒  
寶鈔俾還任無何疾作抗疏乞休遂加太子少保致  
仕賜璽書馳傳還鄉仍命有司月給廩米二斛歲供  
輿隸四人蓋歸既逾年而疾甚以至不起公爲人負  
礪志自爲主事已綽有賢聲嘗督天津諸衛官兵採  
秋青草卽日奏減歲增之數三十五萬束令止輸原  
額蘇松諸郡折糧銀爲里豪所侵者七十五萬兩有  
奇公往徵之不數月悉輸內帑尚書金公濂大咨異  
之自是更景泰以至天順其所任職皆嚴辦而賢能  
之聲日益有聞辛巳朝廷出師征兩廣叛寇命公往

督饋餉時郡邑殘破公私匱乏百方籌畫事克有濟  
大率如弛鹽商越竟之禁俾得隨處貿易而引輸粟  
二斗於南雄梧州用是兵不乏食而民不出賦輿論  
稱之是冬母喪乞守制不許明年師還始歸甫又明  
平復任未幾而有太常之命先是爲少卿者多不檢  
一詞官缺請託紛然公至僉舉以公遂怙怙服蓋其  
爲務甚簡而公任之嘗不勞餘力識者固已知非公  
久處之地矣閱歲再荐遂入朝爲戶部尚書楊公出  
以剛打自任不假貸於僚佐然獨重公事經公斷制  
者卽不復省屬時四方奏災異三邊告輸稅文移選

某啓議費牛裁決如流不淹刻而靡不曲當人咸服  
公爲不可及辛卯京師饑公奉勅發太倉粟米一百  
萬斛減價糶以利民權貴有乘時射利者公請於上  
免糶以升斗計滿一石者閉不與其計遂沮而饑者  
獲濟壬辰上命將北征特勅公總督軍餉於秦晉諸  
邊公倍道疾馳比至則邊庾空竭歲且不登芻粟價  
湧而榆林延綏糧道險遠輸者病之公內發金于內  
郡市易且修西安韓城同官徑道以便飛輓是行所  
向無敵虜酋授首公勞伐居多凱旋加俸一階尋遷  
吏部銓綜人物號爲清允比陟南臺府更留府剷除

宿弊蓋不動聲色而事皆就緒不假威嚴而人自懼  
服名德老成上方倚毘而公乃引疾決去秩增官解  
而祿之終身豈偶然哉公嘗以文學聘考庚辰會試  
乙丑南郊命公獻北海神壇冊封藩王持節正使之  
荆府他凡大祭祀大燕享公無不與而上寵異之願  
賜綵幣書籍之類亦不一而足吁如公者亦可謂榮  
遇也已公先世潁川人系出漢大丘長寔十九傳至  
隋莆田兵馬使邁始家於莆曾祖福六祖明善考珪  
歷官文昌天長教諭皆以公貴累贈資政大夫南康  
兵部尚書

南史部尚書王公輿傳

黃佐

王輿字廷貴常州武進人祖友諒福建延平府同知  
父守正兵部武選主事皆累贈南京吏部尚書輿十  
歲能爲詩正統甲子以縣學生舉應天鄉貢景泰辛  
未與禮部會試 賜進士及第第三人授翰林編修  
被 旨借諸庶吉士讀中秘書給酒饌筆札諸物癸  
酉旱代祀東嶽雨輒降有讓嶽神并代嶽神答詩甲  
戌以父憂去天順丁丑仍舊職庚辰同考禮部充  
太子講讀官辛巳預修 大明一統志成有白金綵  
幣之賜癸未再考禮部得人尤多秩滿遷侍講甲申

憲宗登極錄侍從勞擢左春坊左庶子仍兼侍講時  
始開經筵勅充講官復賜金幣又勅修 英宗實錄  
分掌禮館纂述詳慎得史臣體念母老求便養成化  
乙酉李文達公薦改南京翰林學士乃迎養於官丁  
亥 實錄成復以舊勞賜金幣戊子以母喪去辛卯  
服闋適南京監缺祭酒 朝廷用吏部薦卽其家起  
之時教法久弛乃嚴立程制核勤惰爲懲勸諸司差  
遺一按名籍不爲私假又條奏便宜數事俟風采凝  
峻廉角峭厲素善奕且所酷嗜及爲祭酒輒絕不復  
事其克制操執不爲俗變類如此故教法修整羣士



皆斂衽欽服凜然稱嚴師焉壬寅秋再滿擢南京吏部右侍郎吏弊滋甚凡差撥則庭闕不可制乃酌爲定規弊始息丁未召爲戶部左侍郎弘治初遷南京戶部尚書尋改吏部考諸司官屬諷訪去取務合輿論又奏共有小過而才可用者若干人得降秩補外俾圖自勵又上疏陳八事多見采納自餘細務悉爲綜理咸得其宜癸丑年七十疏請致仕上優詔勉留再上亦如之甲寅以兩考還鄉臥病疏復上辭益懇上重違其意許之又念俱舊臣進階榮祿大夫命有司歲給廩粟與祿以示優異報至已疾篤以乙

卯五月二十二日卒年七十有二訃聞贈太子太保  
溢文肅遣官諭祭賜葬俛奉親極孝養事伯兄甚謹  
以三品 恩移磨兄子澄爲國子生歲出所積穀贖  
族人者若干斛遇鄉黨子弟有恩嘗購得楊氏別業  
有世墓慰令勿徙缺其垣俾歲時往祀焉俛博學高  
識爲文章雅健有法兼精吏事敏而能勤久在散地  
老雖居重位又不值繁劇人以爲未盡其用云所著  
有思軒稿若干卷行於世子沂成化乙未進士累官  
至都察院右副都御史以才行世其家

明故南京吏部尚書致仕贈太子少保楊公守

陟神道碑銘

李東陽

浙之東有稱碧川先生楊公者諱守陟字惟立鏡川先生文懿公之弟也世居寧波之鄞祖栖芸先生諱九疇鄉稱宿學父諱自憇明經不第官止泉州倉使皆用公貴贈通議大夫南京吏部右侍郎文懿公諱守陳以進士入翰林累官吏部左侍郎兼詹事府丞贈尚書文名擅天下公家自師友舉成化戊子鄉貢第三戊戌禮部第四廷試第二授翰林編修丁未九載考績會其從兄工部尚書公守隨官御史爲

人李孜省所中謫官於外公亦遷南京侍讀弘治戊申 孝宗召還京纂修 憲宗實錄己酉充 經筵官庚戌同考禮部會試辛亥書成進左春坊左諭德清理武選貼黃壬子主順天鄉試乙卯以內閣薦擢翰林侍講學士主應天鄉試丙辰畧院事修 玉牒授庶吉士業丁巳充會典副總裁戊午 今上爲皇太子出閣講學充侍班官尋擢南京吏部右侍郎庚申攝南京兵部辛酉攝南京國子監事三載考績疏請省基於家壬戌至京師時會典尚未就內閣請暫留公叅總癸亥以書成遷左侍郎加休二級復舊任

甲子得末疾請老不許乙丑 今上嗣位以年滿七十請益切進尚書致仕比 命下公已抵家矣逆瑾竊政矯 詔奪所加秩瑾敗乃復家居七年一日筆數語於冊曰學文師韓吏部學道師程伊州官同吏部二品壽過伊川二年文章可得而聞望道而未之見困學勉行老而不倦守正疾邪至死不變越五日爲正德壬申八月十五日卒於正寢距其生正統丙辰七月七日壽七十有七 上聞訃悼惜贈太子少保遣官諭祭者再命有司治葬事所著有碧川小集玉屑初稿華省南北稿東察退稿北門私稿觀乾齋

寒寒菴稿又有程朱文評碧川詩集困學寮聞錄總  
若干卷文學論議隱然有文懿風履歷亦略似而舉  
解元爲學士爲少宰對署兩京翰院尤稱奇事工部  
公及公從弟廣西右布政使守隅從子刑部右侍郎  
茂元四川按察使茂仁皆舉進士豐城訓導守隅中  
府都事茂恕及從左府都事美璜皆出國子布政  
而下皆公所啟迪者東南文獻於斯爲盛

南京吏部尚書黃珣傳

黃珣字廷璽浙江餘姚人成化辛卯鄉試解首辛丑  
進士廷試第二授翰林編修歷侍講右春坊論德蒞  
國子司業事歷陞南北國子祭酒弘治十八年陞南  
京吏部右侍郎正德二年進本部尚書時逆瑾方任  
情黜陟大臣遂傳旨令致仕九年八月卒賜祭葬贈  
太子少保珣平易厚重不存吟哇爲文如其爲人云

南京吏部尚書封特進光祿大夫柱國新建伯

海日王公華墓誌銘

楊一清

正德己卯寧濠稱亂江西鳩集羣盜發數百艘而東  
連近震動巡撫南頓都御史王守仁伯安傳檄鄰境  
舉兵討賊時其父南京吏部尚書致仕居會稽有傳  
伯安遇害者人謂公曰盍避諸公曰吾兒方舉大義  
吾避安之或曰伯安旣仇賊賊必陰使人行不利於  
公避之是也公笑曰吾兒能棄家討賊吾何可先去  
以爲民望祖宗功澤在天下賊行且自斃吾爲國大  
臣恨老不能荷戈首敵卽有不幸猶將與鄉里子弟



共死此城耳因使人趣郡縣宜急調兵糧爲備禁  
首勿令動搖人心鄉人竊視公晏然如常時衆志亦  
稍稍定蓋不旬月而伯安之捷報至矣初賊濠東下  
將趨南都伯安引兵入南昌奪其巢賊聞大恐急旋  
舟伯安帥吉安知府今都憲伍君文定等大戰於鄱  
陽湖賊兵風靡遂擒濠并其黨與數百人獻俘於闕  
嗚呼自古奸雄構亂雖有忠臣義士必假以歲月乃  
能削平禍難伯安奮戈一呼以身臨不測之淵呼吸  
之間地方大定公聞變從容羣囂衆撼屹然不爲動  
伯安得直前狗國不嬰懷內顧以成懋績公之雅量

伯安之精忠義勇求之載籍可多見哉及是武廟  
南巡權奸妬功構飛語陷伯安跡甚危衆慮禍且及  
冢公寂然若無聞辛巳今 皇帝入嗣大統始下詔  
表揚伯安之功召還京師因得便道歸省 論功封  
推誠宣力守正文臣特進光祿大夫柱國新建伯又  
以廷推兼南京兵部尚書叅贊機務錫之誥券封公  
勳階爵邑如子俾子孫世其爵適公誕辰伯安捧觴  
爲壽公感然曰吾父子乃得復相見邪賊濠之亂皆  
以汝爲死矣而不死以爲事難碎平而平之然此仗  
宗社神靈朝廷威德豈汝一書生所能辦此謹構楨

行禍機四發賴 武廟英明保全今國是既定吾父子之榮極矣然福者禍之基能無懼乎古云知足不辱知止不殆吾老矣得父子相保庸下孰與犯盈滿之戒覆成功而毀令名者耶伯安跽曰謹受教公自是日與姻黨置酒宴樂歲暮舊疾作嘉靖壬午春二月十二日終於正寢得年七十有七未屬續時使者以部咨將新命至公尚能言趣諸子曰不可以吾疾廢禮宜急出迎既成禮偃然而逝訃聞 上賜諭祭命有司治葬事伯安偕諸弟卜以卒之明年秋八月某日葬公郡東天柱峰之南之原具書戒使者詣鎮

江請子銘公墓子曩官外制官大常接公班行不鄙  
謂予以知言見待子遷南京太常辱贈以文公校文  
南畿道舊故甚洽正德丁卯公取嫉權奸歸致仕余  
亦避讒構謝病歸杜門不接賓客公直造內室慰語  
久之伯安又予掌銓時首引置曹屬號知己公銘當  
子屬顧以江西之變關係公父子大節特先書之乃  
按公門人國子司業陸君深所著狀摘而叙之曰公  
姓王氏諱華字德輝號實菴晚復號海日翁嘗讀書  
龍泉山中學者稱爲龍山先生上世自瑯琊徙居會  
稽之山陰又自山陰徙餘姚四世祖諱性嘗有文武

才圖初誠意伯所薦仕至廣東岑讓桐苗爲亂死之  
高祖諱彥達號祕湖漁隱年六十棄父尸自苗壤歸  
葬痛父死忠布蔬終其身人稱孝子曾祖諱與準號  
磁石翁學精於易嘗筮得震之大有謂其子曰吾後  
再世其與與具久乎祖諱世傑號槐里子以明經貢  
爲太學生卒父諱天叙號竹軒初以公貴封修撰後  
興槐里公俱贈嘉議大夫禮部右侍郎今以伯安功  
俱追封新建伯祖妣孟氏封淑人妣岑氏累封太淑  
人遷封太夫人公生正統丙寅九月孟淑人夢其姑  
抱辨衣玉帶一童子授之曰婦事吾孝孫婦亦事汝

孝吾與若祖丐於上帝以此孫畀汝世世榮華無替

故公生以今名名長兄以榮名符夢也公生而警敏

始能言槐里公口授以詩歌經耳輒成誦稍長讀書

過目不忘六歲與羣兒戲水濱見一客來濯足以大

醉去遺所提囊取視之數十金也公度其醒必復來

恐人持去以投水中坐守之少頃其人果號而至公

迎謂曰求爾金耶為指其處其人喜以一錠為謝却

不受年十一從里師授業日異而身不同歲終里師

無所施其教年十四嘗與諸子弟讀書龍泉山寺寺

故有妖物為祟解傷人寺僧復張皇其事諸生皆喪

魄走歸公獨留居妖亦寢滅僧以爲異假妖勢恐且  
試之百方不色動僧謝曰君天人也異時福德何可  
量弱冠提學張公時敏試其文與少傅朱齋謝先生  
相甲乙張公並以狀元及第期之名遂起故家世族  
爭禮聘爲子弟師浙江方伯祈陽甯君良擇師於張  
公張公曰必欲學行兼優無如王某者甯親造其館  
賓禮之請爲子師延至祈陽湖湘之士聞而來從者  
踵相接甯處之梅莊別墅中積書數千卷日夕觀讀  
其間學益進邠俗好妓飲公峻絕之三年如一日邠  
士有化服者歸連舉不利成化庚子發解浙第第二

人明年辛丑廷試第一甲第一人授翰林院修撰甲  
辰充廷試彌封官丁未同考會試弘治改元戊申與  
修 憲廟實錄充經筵講官己酉滿九載以竹軒公  
憂去癸丑服闋遷右春坊右諭德丙辰命爲日講官  
賜金帶四品服公在講筵音吐明暢詞多切直每以  
勸聖學戒逸豫親仁賢遠邪佞爲勸 孝廟嘉納焉  
丙侍李廣方貴幸嘗講大學衍義至唐李輔國結張  
后表裏用事衆以爲事頗涉嫌欲諱之公朗然誦說  
無少避忌左右皆縮頭吐舌 上樂聞之不厭罷講  
遣中官賜尚食 皇太子出閣詔選正人輔導用端

皇太子出閣詔選正人輔導用端



國本公卿多薦公自是日侍 東宮講讀眷賜加隆  
戊午命主順天鄉試辛酉再主鄉試應天得士爲多  
壬戌遷翰林學士食從四品祿命授庶吉士業修大  
明會典爲纂修官書成遷詹事府少詹事兼學士掌  
院事與編纂通鑑纂要 是歲遷禮部右侍郎仍兼日  
講 武廟嗣位遣祭江淮諸神乞便道歸省以孝太  
夫人年高乞歸便養不允明年改元丙寅賊瑾竊柄  
士夫側足立爭奔走其門求免禍公獨不往瑾銜之  
時伯安爲兵部主事疏瑾罪惡瑾矯詔執之廷杖竄  
南麓以去瑾復移怒於公尋知爲微時所聞名士意

稍解奠公一見且將柄用焉公竟不往瑾益怒丁卯  
遷南京吏部尚書猶以舊故致慰言奠必往謝公復  
不行遂推尋禮部舊事與公本不相涉者勒令致仕  
既有以其同年友事誣毀之者人謂公當速白不然  
且及罪公曰是焉能挽我我何忍訐吾友後伯安復  
言京師聞士夫論及此將疏辯於朝公馳書止之曰  
汝將重吾過邪公性至孝初竹軒公病報至當道以  
不日當遷官宜出受新命公臥家不出日憂懼不知  
所為踰月計始至慟絕幾喪生襄葬穴湖山遂廬墓  
下集故虎穴虎時祭至不爲害久且益馴人謂孝感

此致仕學太夫人年近百歲公壽逾七十猶朝夕爲  
童子嬉戲以悅親左右扶掖不忍斯須去側太夫人  
卒塊苦辨踊過毀致疾及葬徒跣數十里疾益甚竟  
以是不起處諸昆弟篤友愛祿食贏餘恒與共之視  
其子若已子氣質醇厚坦坦自信不立邊幅議論風  
生由衷而發廣庭之論入對妻孥無異語人有片善  
亟稱之有恙惻然赴之至人有過惡則盡言規斤不  
少回曲坐是多遭嫉忌然人諒其無他則亦無深怨  
之者識宏而守固百務紛沓應之如流至臨危疑震  
鴻衆披靡惶惑獨卓立毅然不爲變若是蓋有人豸

及知者矣公之學一出於正書非正不讀客有以仙  
家長生之術來說者則峻拒之曰修身以俟命吾儒  
家法長生奚爲儉素自持貨利得喪不屑爲意樓居  
厄於火貲積一空親朋來救焚者款語如常爲詩文  
取達意不以雕刻爲工而自合程度所著有龍山稿  
坦南草堂稿禮經大義諸書雜錄進講餘抄等稿共  
四十六卷藏于家初配贈夫人鄭氏先公三十六年  
卒繼室趙氏封夫人側室楊氏子男四長卽伯安守  
仁名號陽明子其學遂於理性中外士爭師之稱陽  
明先生次守儉太學生次守文郡庠生次守章

資政大夫南京吏部尚書贈太子太保謚清節

孫公需傳

費宏

公諱需字孚吉姓孫氏別號冰檠江西德興人祖諱原真永樂乙未進士歷官兵部尚書爲一時名臣父葵軒諱敏爲人豪邁領景泰癸酉鄉薦司訓楊州以公貴累贈南京刑部尚書公少穎敏有大志稍長補邑庠生潛心經史從邑令四川鄧公祀學易遂得其傳儕輩皆自屈以爲莫及提學副使夏公寅閱公所爲文稱不容口成化辛卯領鄉薦爲第二人明年遂登進士第釋褐後循例省親筮仕爲常州府推官常

俗富侈訟輒恃賄取勝公遠嫌自潔勤於訊鞠惟公  
惟明隱奸宿蠹撻扶無所漏能聲驟起巡撫牟公俾  
重之凡獄之難決者率以屬公及經公聽斷無不屈  
服運河淤塞撫按取徑別鑿一河初委他官延久緒  
弗就及屬公督理相地賦役約先完有賞民踴躍趨  
事不旬月而功告成三年例當奏課牟公疏留治事  
不得行又三年爲成化戊戌召入授南京四川道監  
察御史風裁凜凜留都皆嚴憚之遇事必極言無所  
諱避妖僧以左道蠱憲廟率同列斥其罪請誅之雖  
遭重譴未嘗以爲悔嘗奉命巡倉至中都鎮守中官

欲謁者由旁門入且以文東武西榜於門公不入僅  
投一刺將獲其所榜以僭劾之中官憚公嚴卒正主  
客之禮於是王端毅公方叅留務最慎許可然輒造  
公之寓而加禮焉江盜熾公巡江以方略投者民張  
禮捕獲幾百人有賊七十籠公卽令錦衣同事簡千  
戶檄以印緘送之官奏禮爲巡檢專捕盜事自是江  
道寧帖簡嘗對衆歎公之廉曰盜賊無籍使孫公盡  
取之固無知者而公不欺乃爾何可及耶公廉聲由  
以益著未幾陞四川按察司副使南臺陞憲副蓋自  
公始前此所未有也公蒞任會憲長缺遂署其事公

費率捐已條給之略無難色按部治豪猾決滯獄明而不苛民訟寃所在奔赴旌吏或望風解印綬去比繹所得紙劄價皆輸之公無毫髮私入屬守有案以簡伉聞者獨見公遜屈如儀御史陳瑤素以勢凌轍二司獨於公曲加禮敬又以公廉嚴慎克振風紀薦之歲侵糴貴民死徙過半公開湖廣倉粟頗多言於撫按借參議金公澤兼程往貸焉得三十萬石而西分地賑給所全活甚衆蜀人感之咸曰微孫公吾皆爲道殣矣時已歷兩考當奏課巡撫都御史丘公龜疏留治事蓋在蜀已餘七年吏部推陞者五邑人有



不悅公者諧於時宰乃久不遷而公未嘗意動尋以  
蔡軒憂歸故事凡藩臬舟行以瞿塘滄瀨之險命有  
司縛筏翼之至荆州市其竹木可數百金公不欲斂  
民間利竟拒不用亦竟無他虞終喪改湖廣未上擢  
浙江按察使遇大獄必加審覆未嘗輕決小吏苟無  
大過必保全而扶植之臺使薦賢監司公必首及弘  
治庚申陞浙江左布政使浙財賦之淵公志避嫌詢  
出納皆委諸人公堂諸宿弊廢革殆盡吏無所售其  
奸民謠有前劉後孫清德者問之語蓋以公可繼大  
司馬東山之闕也入覲例會木手取銀爲道里費朝

士之贊亦取辦焉公峻拒贊率從簡論者賢之第治  
行又首及公還浙未浹旬擢都察院右副都御史巡  
撫河南時河溢且囓汴城民流移載道公議役以築  
堤而予之傭錢令出趨者萬計隄成而饑腹飽公私  
便之羣盜橫行命將領督兵擒捕先後獲數十人復  
取其贓散州縣以充賑給之費他若獄平賦鋤強  
植弱華孳在念民所便不便皆以次行罷無遺弘治  
癸亥駕帖下河南取牡丹三千本公疏耳目之玩不  
可勞民泌陽知縣馮憲忤宗藩已有旨下撫按官會  
訊尋復逮赴詔獄公疏令如反汗殊戾舊法 孝廟

皆納其言而寢之居三年屬吏競勸民視公如父母  
然鎮守中官劉瑯與公水火瑯剝民自植公輒以法  
裁之有奸民違例赴瑯投愬牒者公據法配之荒裔  
瑯嘗跪請於公曰瑯不能學公之廉公蓋稍縱繩墨  
使瑯得飲勺水以相安於此邪公心知瑯必害已亦  
不爲動瑯日夜陰圖中公大臣之子有怙勢橫於其  
鄉者公亦裁以法於是瑯計得行會陝西巡撫缺遂  
調公住補蓋大臣亦不欲公之久于汴也公去汴汴  
人遮道攀留呼天而號曰何爲奪我公而他界也至  
陝釋略武備拊循士卒取責臣所私役復之舊伍他

省有輸粟助邊者皆令躬自輦送無苦邊氓聞虜警則以義激將士督之先驅而亦擐甲從之不以勞避緣是項領爲風寒所襲而病遂乞休詔不允乃召還京去陝陝人攀號如去汴之日道彰德守以銅爵硯贈公亦弗納寓館陶堅臥不起累以疏辭時 孝廟方命侍郎何公鑑稽覈荆襄流民而鄖陽其淵數也乃改公提督撫治公至以文告諭之願爲編氓者給牛種俾有常業願歸故里者給餼遣之籍管內所得逋逃蓋數萬餘口又以教化爲撫民急務乃興建學舍釋秀民聚講其中有暇則親往課之未幾士習丕

變應試者倍於嚙昔武當在境內先是國家諸祈禱  
費皆民出公曰山有香錢鉅萬典守者輒私之是不  
可取爲享神之用邪令有司籍記悉貯均州於是祈  
禱之費不擾於民矣耶人謂前此撫治未有如公之  
精密者正德丁卯陞南京兵部右侍郎過安陸謁

恭穆獻皇帝錫宴有厚賞焉公辭不受帝益賢之比  
至留都值榮王之國過金陵欲登城一覽形勝公謂  
法不可擅登乃止已巳陞南京禮部尚書時逆瑾專  
政陞者多以賄謝公方坐崇藩之累罰輸邊米數百  
石囊如懸磬蓋不能辦而心亦醜之瑾以公不附已

未數月矯旨令致仕歸歸則故居已燬幾無以爲生  
公處之裕如也庚午瑾敗復用薦起爲南京工部尚  
書務釐宿弊不欲以浮冗多耗民財先是諸管建給  
領料價率匠魁專之蒞部事者或與爲市故羣匠無  
所得而工不可速完公乃令匠魁及羣匠同領而均  
分之稱便如一口出歲省冗費常數萬金癸酉冬改  
南京刑部尚書諸司獄必親筆削處當奏讞皆極審  
慎人無冤稱甲戌夏考最遂改南京吏部尚書留都  
務簡公表以廉靜諸司翕然明年奉命考察庶官諸  
所存黜叅之公論無毫髮私徇其黜者止坐微罪不

忍以秦甚斥之或曰如此則彼將不服且得籍口自  
文公曰吾斬服彼之心苟公矣他何慮耶蓋所黜數  
人頗有時望聞者始而疑焉旣而廉之果當黜於是  
益服公之明矣自是年至於丁丑凡八上疏乞歸皆  
不允戊寅疏修政弭災戒遊畋抑權倖諸事以年及  
遂停俸懇辭 上閔勞公特允所請俾乘傳歸賜勅  
若曰卿効勞有年操持清慎朕方倚卿爲留都諸緝  
紳措範而乃浩然有歸志邪其命有司給廩粟月二  
石與隸戍三人以示朕優禮老臣之意公歸以晚年  
餘俸創屋數楹摘勅中兩全二字以名之里居自守

益覈於州縣無所干謁嘗出乘肩輿少一卒子姪欲  
請縣索之公不可曰上賜我輿隸將何爲而又煩有  
司別給邪其一介不苟取如此其卒也士大夫惜之  
朝廷嘉公之賢贈其官爲太子太保子之謚爲清簡  
可謂存順而沒寧無復遺憾矣



資政大夫南京吏部尚書贈太子太保諡恭靖

朱公希周墓誌銘

張 袞

我國朝大臣以清德重望爲朝廷尊禮士大夫敬信  
完名全歸三吳之岳望則有若尚書朱公焉公自弘  
治丙辰狀元及第除官翰林修撰壬戌同考會試明  
年以纂修會典功成陞侍讀充經筵講官中遭逆瑾  
煽虐憾制詞僚公不屈從中奪公官一級爲修撰是  
後預修資治通鑑纂要修 孝廟實錄功成復公官  
如故兼賜御製蟠龍詩軸暨白金彩幣有差庚午主  
應天鄉試明年以憂歸徘徊翰署覲虞半之丙子陞

待讀學士清理武職貼黃丁丑充廷試讀卷官己卯  
陞南京吏部右侍郎尋改禮部復轉左侍郎乙酉陞  
南京吏部尚書前後內閣大學士員缺博咨舊學公  
首盈廷數以公與熊峰石公瑀序菴李公時對二公  
果相而公遵會未能蒼生之望缺如也其在南銓嘗  
丁亥考察媚嫉者譖言於上謂南科無一人之去以  
爲公私公乃力辯其非察僚庶所以別賢否非論曹  
局之有無也使一曹皆賢必去一人以爲公則一曹  
偶皆不肖亦將姑去一二以塞責乎詞嚴義正聲震  
朝堂上亦不之譴仍聽公稱疾東歸勅有司歲給人

夫四名月給廩米三石恩數之隆今時未有也公歸  
吳趨里中市貨溢衢紛華滿目入公之堂蕭然如村  
落中見野翁環堵出與賓客游魚魚然雅雅然宛若  
崑山舊弟子里中後生思畏名檢欲一有爲則曰恐  
玉峰先生知玉峰公號也是意也非洛中司馬端明  
邵先生之謂乎田廬閭閻猥事一不置念老隱陽山  
幾三十載未嘗一日去書不觀所著詩文評史論議  
總若干卷其陽山大石賦一篇尤爲吳人所傳先儒  
胡致堂曰守身以仁能以守身之仁正其君大臣也  
邈能正君退能訓俗公之出處可以作大臣鑒矣

車當路疏公當起者前後幾三十人公爲人莊重簡  
淡嶷然有守其夷易平直廉不徵名學惟務實思以  
友三代之英於百載之上平生志切友于孝其二親  
篤甚臨終戒其子孫身後不得請恩於朝萬一臺章  
以聞 主上憐之賜謚易名願無以文爲謚脫犯吾  
父之諱亡魄何安小子切記之公諱希周字懋忠享  
年八十有四嘉靖三十五年十月三十日終于正寢  
典刑所在遠近慕惜之朝廷卹典不煩陳乞而臺臣  
之奏禮工二曹之議相公仰承聖懷於是贈官太子  
太保謹恭靖從公志示後勸云公家世本睢陽避金

人之亂南奔入吳中籍常熟再徙崑山則戶科給事  
中諱吉始也爲公之高祖自崑山復入郡中爲吳縣  
人則雲南按察副使蘧菴公諱文始也爲公之父曾  
祖諱永安未仕祖諱夏以子蘧菴公貴初贈監察御  
史後同蘧菴公以公貴俱贈通議大夫南京吏部右  
侍郎

南京吏部尚書白樓吳公一鵬傳 方鵬

公姓吳氏名一鵬字南夫別號白樓學者尊稱曰白樓先生世家蘇之長洲山塘里曾祖敬不仕祖琮以公貴贈南京太常寺卿妣周贈淑人父行封翰林院編修累贈太子少保南京吏部尚書妣司繼趙俱累贈夫人公自少端重秀穎游歌郡庠蚤有令譽成化丙午領鄉薦卽遭內艱廬於墓次弘治癸丑登進士改翰林院庶吉士時學士李公東陽程公敏政皆負文章重名慎許可每羣試必在甲乙亟加稱賞乙卯除編修預修會典及教內豎戶部尚書周公經被讒

去位上疏請留之人躋其直己未同考禮闈閱春秋  
卷庚申丁外艱甲子服闋復除編修纂資治通鑑節  
要及修玉牒正德丁卯進侍講充經筵講官音吐洪  
亮辭旨清切左右聳聽戊辰同考禮闈閱易卷詩逆  
瑾盜政朝士見者多屈膝公與同官遇之長揖而已  
瑾銜之未有以發也已巳修 孝皇實錄成吏部奏  
例當進秩瑾遂以未習吏事爲名俱令別用公得南  
京刑部廣東司員外郎司事最劇而公詳敏仁恕囚  
皆感服僚友取獄詞讀之驚曰老史筆也庚午遷南  
詞祭郎中兩部尚書皆鄉曲故舊見公跼踖不寧待

以殊禮公抱成案立左右咨稟略無崖異瑾伏誅復  
公侍講經筵如故辛未復同考禮闈閱詩卷壬申陞  
侍講學士癸酉主順天府鄉試有槌策問中語謂譏  
時宰者當道信之出爲南京國子祭酒至則以誠心  
待士以簡易立法又積饌金易民居爲學官寓舍經  
史多缺板亟補完之未幾轉南京太常寺卿凡所以  
嚴祭祀擇官屬防侵漁節浮費者斬然一新丙子雷  
變甚異公上言天人感應之理辭甚剴切丁丑丁趙  
夫人憂辛巳服闋復除前官今 上登極爲嘉靖壬  
午公上賀表備言祖宗付托之重生民憔悴之極宜



修德勤政以答天下之望入爲禮部右侍郎尋轉左  
署掌部事累辭不允仍賜手勅馳詣湖南改題 恭  
穆獻皇帝神主奉迎來京公念與中貴勳戚同事恐  
其下不戢乃上疏曰今歲涿州抵安陸災傷重大民  
不聊生所宜節省以甦民力隨行儉從或挾聲勢凌  
轍有司爲害者請預禁約上善其言而戒飭之事竣  
歸有白金文綺之賜給事中陳洸已外補僉事仍冒  
舊銜上疏欲假大禮以希留用公劾洸無耻竟以罪  
去癸未命掌詹事府事以本官兼翰林院學士入東  
閣專管誥勅時修 武廟實錄仍命充副總裁乙酉

史成進禮部尚書兼官如舊復賜白金文綺是冬乞假歸吳省墓命馳驛以行丙戌還朝上疏言臣途中往來見江南亢旱淮北大水乞遣官體勘或蠲其租或貸之粟河道湮塞乞下詔訪求或濬故道或開別支則民艱濟而河運通矣 上嘉納之又以災異疊

見奏乞休致丁亥春復申前請皆溫旨慰留有純謹端諒學行著聞之語於是譽望日重爭進者側目內閣闕人廷議兩以公名擬上皆不果用而出掌部事之命下矣岷藩與棗陽庶人俱奏乞復王爵序班錢子勳訓導王玠以考察去官亦援嘗議大禮奏乞復

官左侍郎桂公皆曲爲之請公一切不聽明年桂改  
吏侍挾前憾與同官蘇去公奏加太子少保改南京  
吏部公聞之笑曰此吾舊游之地意所戀也至官益  
修厥職固敢自暇己丑尚書滿二考復上疏乞休大  
略謂韓琦有曰保初節易保晚節難臣今年甫七旬  
禮宜引退以全晚節 上察公真誠特俞之命有司  
月給米三石歲給人夫四名益異數也公既歸乃於  
所居之西創崇正書院以奉先聖先賢聚里中髦士  
肄習其中割田百畝供膏火之費嘗言于有司修拓  
尹和靖舊祠并祀胡安定范文正二公名三賢書院

表章陸忠宣公陳孝子諸祠墓約諸鄉衮月一會爲  
文字之飲隱然有洛社之風焉配宣氏薛氏俱累贈  
淑人子男二子忠早卒子孝巳丑進士改庶吉士今  
以文選主事奏乞歸養文章志節屢出人表

資政大夫南京吏部尚書贈太子少保謚恭肅

張公潤墓誌銘

聶豹

嘉靖壬子三月二十有九日尚書西磐張公卒於家  
訃聞天子詔贈公太子少保賜謚恭肅仍遣官管葬  
事公諱潤字汝霖河東臨汾人弱冠爲弟子員弘治  
戊午舉鄉試第一人壬戌登進士授令宜陽清修有  
惠政正德丁卯擢刑科給事中抗言大計侃侃不阿  
奉詔覈甘肅邊儲稽察精明河外震懼還遷禮科右  
吏科左戶科都給事中時盜賊延蔓屢用大師水旱  
流移征調繁急公請嚴紀律酌轉輸廣招撫時賑恤

章數十上採納爲多甲戌擢順天府丞戊寅擢左僉  
都御史巡撫順天至則黜貪殘拯彫弊條上邊民疾  
苦及便宜十餘事悉見施行郊圻盜起虜復寇邊公  
指授方略盜平虜遁有白金蟒衣之賜己卯以外舉  
歸辛巳起撫寧夏夏弱鎮也不百里卽虜巢公簡士  
馬振紀綱謹烽堠修築亭障聯絡聲援境內晏然講  
棧屯田鹽馬諸政日奏正豪藩裁抑宦鎮姦嬉問道  
一切絕之癸未召還理院事乙酉以九載績晉左副  
都御史理院事五年署篆者半振揚法紀臺中肅然  
每疏上皆切中時務丁亥以大獄譴歸臺諫屢請錄

用已亥詔復原任遂轉兵部右侍郎又轉戶部左督  
太倉公搜逋抉隱剋洗奸蠹兵民權服明年晉工部  
尚書時大工並興漏卮乾沒百出公躬勤省闕宿弊  
盡祛廼請酌緩急爲先後上忻納之力專功過費省  
舊之半屢賜金幣褒焉辛丑以內艱歸服除言官復  
請亟用爲考察內僚起公爲南京吏部尚書蒞任卽  
甄別去留輿情胥服再疏乞休皆荷溫諭不允戊申  
以考績赴闕畢卽過家懇求致仕時已改戶部尚書  
仍督太倉矣 上亮公誠乃允焉家居優游林壑足  
跡不及城市然每聞朝廷一善政輒喜動顏色見民

疲役冗每悒悒不自安持守堅凝動有恒則雖事變  
猝至處之裕如初使甘歸逆瑾索賄無以應欲中危  
法公不爲動然竟莫能害也廷推巡撫時逆寧使人  
曰欲副乎欲僉乎意以賄爲差也公曰惟辟作福人  
臣敢有擇耶寧深憾欲中傷會敗乃已毅皇西幸寵  
聞請改榆河驛爲行宮公力陳民貧財訕仍舊爲宜  
毅皇從焉正位司空權貴目工役爲奇貨陽施陰奪  
公悉以法裁之勅減某時主夫役請發太倉銀助工  
實欲私之公力爭曰此朝家正脉軍國仰資急近利  
而廢遠圖豈人臣謀國忠耶事乃寢某積不能平屢



以危言林且草彈文示公不顧也臨事精詳必求可  
久之計官蹟所遺雖名人繼往率取則焉天性孝愛  
事親色養弗違親終並獲祭葬蓋異數也兄滋弟灌  
皆爲納八品散官處宗族恩禮兼盡歲時祀先必謹  
榻諸子孫嚴而有則自奉無異寒素歷官南北行李  
蕭然好學問文章雖老不倦所著有奏議公移華是  
錄試筆稿經略兩鎮詩共若干卷藏于家生於成化  
庚寅壽八十有三祖復祥父鑄父祖皆累贈南京吏  
部尚書祖妣鄭繼史妣某皆累贈夫人喬氏封夫人

南京吏部尚書吳公嶽傳

吳嶽字汝喬其先東阿人也遷汶上三世生嶽舉嘉  
靖壬辰進士歷戶部主事郎中知廬州保定二府歷  
山西副使浙江叅政湖廣按察使山西右布政使晉  
右僉都御史以疾請告家居數年起爲右副都御史  
協理院事轉吏部左右侍郎南京吏部尚書滿考致  
任嶽爲人耿介端方清操絕俗主事督上谷餉積羨  
千金更以送納正色拒曰羨金卽正餉也或以爲利  
甚耻之爲郡治貴大體不尚苛細山澤之稅及吏  
役班價舊供府堂悉罷卻之用代厨傳人以爲難保

定在輦轂下一時徵發四出民不能應獄具疏奏赦  
免十六七諸郡以寬隆慶改元奉詔大察內吏科臣  
有異議疏入留中部院疑恐獄詣政府抗聲曰公視  
諸故府往考察去者科官欲留之有諸其母以傷國  
體閣臣悚服其事遂寢在南都專抑浮薄杜僥倖板  
會約禮考諸書以行風俗爲之一變卒年六十有七  
遺命子孫毋求卹典事聞諭祭遣官管葬賜諡介肅  
平生孝友誠厚篤於倫誼待人容恕居常恂恂見人  
不善嫉之如讐奉身儉素器無銀飾服無裁綺歸自  
留都行李蕭然廳事不備至借僧寺接客里人信其

清苦不謂異也工爲詩歌沉深典雅屏去色澤而耻  
以自炫著述不多梓行詩集二卷

維風編

吳太宰公嶽爲廬州守時中丞南岷王公廷爲蘇州  
守二公同年友也一日以公務會於鎮江吳折柬徵  
王公爲金山之遊載酒一瓶米數合肉斤許蔬一束  
於舟中屏駒從趨王公同舟而往王公熟視其具笑  
曰兄昨折簡相招將爲主延欸我也其具止是耶吳  
公曰足吾兩人用可矣多具何爲比至吳公命庖丁  
卽所成肉蔬米治具相與論心話舊或跌坐磯頭

或倚徒水際竟日而還王公晤余淮上爲道其事余  
喜聞後嘗模之以待同志云惟今士紳宴會如此風  
致豈不可嘉尚哉公爲廬守無何以宅憂還里行間  
阻陰雨持公署一傘歸歸舍仍還之屬貯庫余校士  
于廬廬人士至今口其事云公起復補保定守後嚴  
太宰清亦爲保定守余每過保定遇此中士紳輒詢  
二公政績孰優一士紳謂余曰二公皆吾郡之名守  
也嚴之德澤洽我民肌膚矣若吳公德澤則尤入我  
民心髓也余嘆羨之後又遇一主政主政亦保定人  
也余又詢二公政主政曰二公清約之節同仁愛之

心同明敏之材同但吳公若有天授不可及者余曰  
云何曰吳公爲政未嘗用意摘奸剔弊而內之胥史  
隸卒外之市猾田畝若皆貫通於吳公之心而更無  
一作奸犯科者吾不知吳公何以至此也予爲之慨  
然嘆羨者久之蓋其誠能動物矣

南京吏部尚書王公本固傳

王本固字子民邢臺人老成持重不輕言笑甲辰進士仕樂安縣令濱海風號難治公惟清淨持大指首事農桑重學校罷諸不急務當時屢有良吏稱以累薦徵拜御史初使秦以覈兵行繼使蜀以巡察行先後奉公守法官屬肅憚如一未幾丁內艱服闋按浙值倭寇猖獗時有海寇王直者逃罪居倭數爲浙患督府以計誘歸欲釋罪官之公不可竟阻其議置大辟罪朝論遽之督府以寇平欲置酒高會號太平晏以示耀計費萬金公曰元惡雖擒餘孽尚在何太平

將晏乃罷後督府又以廉兵餉事爲言者糾冀公  
報掩之公竟以實聞由是督府愈結分宜柄益憾公  
每求所以中傷之會遼左饑奏命公賑議給米六萬  
石以驟運意爲緩不及事假此禍之耳公奏改一半  
折銀給濟遼陽遠地一半本色給濟廣寧近地凡再  
閱月而完遼左安焉故事御史八年序宜留內公以  
分宜憾事竣竟出陝西西寧副寧有指揮星鎮者罪  
當削職潛入邢臺以千金賄乞免削公覺發之竟坐  
以法又有莊浪糧官勒損軍餉以致魯府家丁叛公  
身論以情法由是叛者僉服後分宜敗公以叅政尋



陞大理寺少卿晉南京都察院右僉都御史奉勅提督江防晏然無警尋移北晉左副都御史歷刑兵左侍郎協理營務隆慶初改吏部會新鄭以政府攝銓衡任意于奪公卿累息下之公獨無所加屢以不合故竟遷南京吏部尚書時當大察京官有爲江陵忌者一給事中一御史遺書欲俱罷官公亦弗許始末歷三柄臣曾不一毫少挫其持正不阿蓋如此云萬曆元年以二品考績遷移疏乞休准調理疾愈公以江陵憾故家居不起日謝人事閱醫藥周會醜族外無他羨焉迨江陵歿屢被撫臣薦揚科道交舉起用

公裕如也年七十一卒歷事三朝俸節豐功昭人耳  
目欽賜葬祭如儀

正奉大夫正治卿南京吏部左侍郎范公理墓

誌銘

楊守陳

公諱理字道濟一字士倫號省菴宋太傅覺民之後  
世居台州自臨海徙天台又九葉矣祖諱彥善考諱  
起宗皆以公貴贈正奉大夫正治卿貴州左布政使  
祖妣陳氏妣潘氏皆贈夫人公少敏悟端凝佔畢一  
呻輒能記縣官嘗以聖壽節習儀鼓吹旗仗喧簇塋  
小生羣往觀公獨若無所聞坐誦不輟衆異之長爲  
諸學生博書工文山畜水涌譽髦皆自謂弗如甫踰  
冠中鄉試第一會試第三皆有文鉞之梓擢壬戌進

士高第 宜宗嘗召諸進士至齋宮親試用人何異  
得真才論公居第二賜白金五兩楮幣五十緡既而  
例歸省還朝時重守令之選拜知江陵縣作榜文諭  
民懇且明盡民口熟之縣當四方之衝過客旁午公  
嚴禁令雖權貴無敢漁一錢先是民累歲負租至十  
四萬石都御史徵之嚴公以民貧不能償也乃召將  
卒家之佃田號畸零戶者諭之曰世言戶役既佃田  
立戶而免役可乎遂定其等俾各出募役之米因以  
償負租畢完且平訟徭勸樹畜恤窮振弱禁奸招通  
訪孝子節婦及忠賢之裔謹學教正禮俗民慶未始

得也以舊令復遽去用薦知德安府亦先榜諭吏民  
大率如江陵教養之政後悉踐其言每歲必再按屬  
以省耕牧廉利弊每季必命題試諸生而第之拔其  
尤寘府後堂暇輒躬爲其師隨州民數百家田爲楚  
府護衛所占猶輸租公備奏盡歸其田民感甚皆立  
主而生祀之滿去以最異超陟福建布政使時大兵  
勦賊鄧茂七等公司饋餉善調度兵皆給食民不知  
賦朝嘉其功賜絲幣表裏各二楮幣千丁潘夫人  
憂起家拜貴州左布政使貴州草創卽驛爲布政司  
以夷之難擾也久莫能改作公奏徙貴州前衛於近

所以其地造司數百楹不擾而就土官無管弗能襲  
職者十五六公悉俾襲吏無敢難常移文以通夷情  
間抗章以獨逋稅餉兵春以糧秋以銀便夷省漕四  
川湖廣饋糧貴州艱甚公俾代糧以銀爲之糴減時  
直十二貴州旣獲利而川廣被惠尤溥秩滿擢南京  
工部右侍郎南京創自國初歲久凡百皆弊葺造費  
鉅公不欲煩民迺請鬻蘆場之新葦抽分局之腐木  
碎炭內府庫之苦瑣布帛通售銀殆萬兩又請南畿  
獄囚贖者隨葺造所需而納於是自 郊廟宮殿內  
外諸署城樓街表或造或葺動輒百千間暨修巡戰

諸船數百兵食諸器數萬皆以次成而民不知又奏  
各處饋南京糧者自舡抵倉多所費每米石費三斗  
請兵就其船人支三月之餉官取費米歲可十萬石  
以備賑貸從之果利尋轉南京吏部左侍郎考課公  
明百僚憚之嘗請老至再不允滿考赴京途遇疾輿  
就其子進士綱之第大漸舉手加額曰無以報朝  
廷無以報朝廷遂薨成化癸巳五月四日也壽六  
十有四上聞嗟悼命有司祭葬之

南京吏部右侍郎王公克復傳略

王克復天順元年進士授刑部主事歷員外郎用薦  
爲江西叅政轉湖廣按察使又江西布政使以副都  
御史巡撫南畿入貳留銓致歸卒於家克復長於法  
律爲刑部時大司寇鄞縣陸瑜深器之凡罪疑必以  
屬克復兩廣撫臣吳禎或奏其不法瑜薦于 上遣  
克復往按河南人誣布政章繪等瑜又白遣克復凡  
兩奉 命讞大獄咸得情歸報稱 旨由是著聲章  
徹出長藩臬吏民素聞王刑部名自不敢欺江西俗  
喜訟滕山積克復判決竟日庭無留者時謂之王一



火又謂王隔壁言其察明聽審也然克復雖善折獄  
持法平不苛所至發奸第取魁桀無濫及南畿清戎  
使者文深多所遣發訴臺克復察其誣者悉爲脫尺  
籍性質實寡言笑刑部十五年布政九年同時後進  
或巧官躡已未嘗介意晚歸與謝瑀輩結耆英會敦  
素尚齒鄉人以爲美談

南京吏部左侍郎李公旻傳

南京吏部左侍郎李旻字子暘浙江錢塘人成化庚子鄉試甲辰廷試俱第一授翰林院修撰丁未預修憲廟實錄弘治改元充經筵講官明年以父憂去辛亥實錄成卽家賜銀十兩綵段二表裏癸丑服闋還朝丙辰考禮部會滿九載陞左春坊左諭德庚申簡侍東宮講讀明年陞南京太常寺少卿尋以本官署南京國子監事正德丙寅召修孝廟實錄改太常寺少卿兼翰林院侍讀仍充講官賜金帶丁卯奉命授庶吉士業尋陞太常寺卿管國子監事未幾陞南

京史部右侍郎已巳陞左侍郎正德四年四月卒賜  
祭葬如例身長身修髯狀貌英偉其於學問貫穿經  
史百氏論辨疊疊聽者終日忘倦在史館善叙事理  
丘文莊公濟爲副總裁見所纂甚稱之其爲人闊達  
儻不甚拘守繩尺亦多爲人所忌云

南京吏部右侍郎贈禮部尚書謚文肅圭峰先

生羅公圮墓誌銘

費宏

先生卒之又明年爲正德辛巳 聖天子入紹大統  
起居舊望言者不知先生已卽世薦疏交上旣而臺  
使以訃聞儒紳莫不惜之曰天乎胡爲奪圭峰之速  
也所司上先生履歷文行以贈謚請詔贈禮部尚書  
謚文肅論祭營葬皆如制又蔭其子垣爲國子監生  
儒紳又莫不宜之曰如圭峰其無媿於異數矣垣卜  
以嘉靖癸未某月某日葬先生某山之原使人至京  
師求狀於考功夏君子中而以銘屬于予先生同榜

素庫恨先生之學不盡其用自先生捐館舍方爲斯  
文悼歎不已尚忍銘先生也哉雖然誼不可辭先生  
諱玘字景鳴號圭峰姓羅氏世家建昌之南城曾大  
父俊傑用薦任蘭溪司稅大父耕隱翁大矩父西莊  
翁文程俱以先生貴贈南京吏部右侍郎大母傅氏  
母傅氏俱贈淑人先生之在孕也其母夢紅光燭天  
有物輪囷數十拖五色雲而下膜拜呼天熊俄墜壓  
而寤越三日先生生兒時頭角嶄異奇氣勃勃言議  
動作皆不肯後人嘗與羣從兄弟遊遇遺金衆爭趨  
攫獨先生礫視之未嘗色動讀書目數行下若涉獵

不甚經意而大義了然西莊遣人邑庠初謁尹尹以少易之試對偶出奇響應尹爲刮目初治春秋旣冠政治書及長樂謝公士元守郡集羣彥講誦又改治詩傳洽淵奧儕類皆莫敢望而文尚奇崛力追古作試於鄉六七竟不爲有司所知成化乙巳應入粟賑饑之詔例升國監時閤老丘文莊公爲祭酒議南士不聽北留先生固以請至三受朴而銑不少挫公心異之然猶且數之曰若能識幾字而崛強乃爾邪先生昂首大聲對曰惟中秘未嘗讀耳乃姑留之而識其名於堂柱越數日季試先生稿立就若宿構焉六

館士數百人無有能及之者公驚歎曰有士如此而不名薦書誠有司之過也更命作長安賦以爲可步兩都遇知厚輒贊賞之丙午試京府時李文正傳文穆二公同典文衡得先生文奇之以魁多士榜出相慶以爲得人明年遂登進士改翰林庶吉士益肆力古文欲卓然樹立成一家言同館類皆推遜弘治己酉授編修名益重求者戶屢相接然先生益自重不苟作有所酬應常杜門謝客終日苦思必得意始命筆意苟未愜稿雖數易不厭也每一篇出釀郁頓挫多不經人道語士林傳誦文體爲之一新志經世限

職守鬱不得施遇時事可言者輒以已見發諸奏牘  
而主於開悟調幹非欲激亢以取名也知武岡劉遜  
坐忤岷藩被逮給事中龐泮等救之觸 孝宗怒併  
下詔獄先生言遜至付所司鞠辨公法具在豈遽按  
而誅之卽有不自救之未晚泮等疎狂誠可罪然在  
陛下宜優容之以全國體又主事李夢陽者以論劾  
張鶴齡忤旨收拷先生謂鶴齡在肺腑 陛下固將  
玉成之若夢陽萬一處死或自裁乃滋爲鶴齡累  
孝宗感動薄泮等及夢陽之責中官李廣死言者劾  
又武大臣嘗以賄交者欲據廣所籍記大行斥逐先



生謂具瞻攸繫不必指而暴其惡也宜論令自陳或  
黜以他事庶不貽 朝廷羞識者疑之乙丑考滿陞  
侍讀正德丙寅陞南京太常寺少卿歷四年轉本寺  
卿尋陞南京吏部右侍郎又嘗一再署國監及通政  
司之事所在必救弊壞而更新之堂隸有募役銀相  
承以給私用獨郤弗受寺外之侵疆既復遂以是創  
爲吏舍有餘又斥之以新庫閤葺古祠留守諸權貴  
見先生挺拔不羣往往巖憚自戢都人遇先生于道  
亦皆肅然時 武宗臨御已五年而前星未耀中外  
人人憂懼自危而莫敢以爲言者先生連疏請早定

大計以繫屬人心潛事奸雄睥睨之念其言迫切且  
侵及當國諸老一無所顧蓋先生雖遠去闕庭而其  
憂世之心懇懇焉未嘗忘也壬申秩滿三載入京至  
良鄉以老請得歸歸山中貽書知舊猶輒以時事爲  
慮然絕意聲利城府無先生一迹逆濠素忌先生心  
甚重之嘗聞以金帛使及門先生豫走旁邑避不與  
接濠亂先生已卧病聞有司將舉義猶豫未決力疾  
作書趣之越二日而卒已卯七月二日也距所生正  
統丁卯享年七十有三

通議大夫南京吏部左侍郎儲公瓚行狀

顧璘

公諱瓚字靜夫別號柴墟本毘陵茂族元末始徙海陵曾大父諱某字仲文倜儻負義嘗隆冬載布數乘入遼遇警道阻人多凍死遂立市門散之又嘗行道中得遺金歸其人其人分謝悉不受此其種德所自也哉厚矣大父諱玉字景榮以公貴贈通議大夫戶部右侍郎父諱信字宗實累封至通議大夫戶部右侍郎母王氏繼母董氏俱贈至淑人公生而穎異六歲讀書過目成誦九歲善屬文選充州學弟子員十

六食康應鄉試名聞京師成化乙亥年二十三王淑  
人疾詞藥不愈乃刺股救之延數旬卒時尚未室宗  
戚強公娶公頓足號天足指俱碎乃已淑人遺命勿  
葬先兆內家貧無資公極力別營墓域每旦伏哭塚  
上夜則苦誦讀以圖顯揚癸卯舉應天鄉試第一歸  
至儀真卽號泣赴家痛母氏弗及見也甲辰會試禮  
部第一廷試賜二甲第一觀政吏部太宰濟南尹公  
欲選爲屬公懇求便養遂授南京吏部考功主事尋  
陞郎中弘治甲寅太宰鉅鹿耿公奏改吏部考功郎  
中公留意人才考注臧否無不曲當一時人士竦然

戒曰儲君陽秋可畏居南部時考察庶官有悍吏肆  
暴不法或憚黜之生亂公毅然贊罷之北部嘗朝親  
考察雖執政親戚不職者咸無假借天下服其公丁  
巳擢太僕少卿次年遭董淑人喪辛酉起服仍補舊  
職行部禁吏迎送除民苛費及馬政積弊乙丑陞本  
寺卿首舉馬政便民者四事疏于 朝語在奏議中  
悉具施行舉望日重性狷介寡合執政不相悅奏擢  
都察院左僉都御史總督南京糧儲釐革倉庾宿弊  
裁省供費及條陳應議四事多所惠益正德戊辰擢  
戶部右侍郎己巳遷左侍郎督京儲其蒞政一如南

都沉靜煇毅中貴同事者咸見嚴憚時逆璽用事大臣多爲屈損稱公爲先生而不敢慢庚午春以疾乞休 詔賜乘傳還仍勅有司解病痊奏聞起用同事太監蔡用素重公廉餽白金五兩兩爲贖辭不受冬十月仍起爲左侍郎辭不就至申春復起爲南京戶部左侍郎時四方多故京儲虛耗公籌畫深遠務善後國癸酉正月改吏部左侍郎時方望其大用遽以疾終公體貌清羸若不勝衣端默簡重凝然具臺閣之器爲文簡古多思尤深於詩冲淡沉蔚兼晉唐之風士林寶之爲訓好賢惜才凡海內知名之士無老

少遠近咸見推引阨窮弗達者必思振起之辟遠非  
類不惡而嚴未嘗有不善人至其門也初璘舉進士  
今司徒無錫邵公嘗相語曰子持身當以柴墟爲方  
終不爲非人累其見推重如此每與學士大夫語必  
政事文學等事否則端坐終日而已人莫敢言其私  
居常與家人言亦恒引古賢孝貞烈故事爲訓絕無  
燕昵語事親至孝侍郎公年八十在堂少有違逆凡  
飲食衣服之養額慮周至兩蒙 恩賜綺幣悉製衣  
以爲悅自主事至侍郎四奉 勅誥推封每臨母淑  
人忌辰必齋戒祭祀以致思平生鬢髮爪甲不敢棄

道藏至數大衰竟以殉斂其謹身慎行此可類推已  
晚爲朝廷倚重故詰辭稱其雅操不尋長才殊出學  
有本原志存貞固簡在固已切矣易箒時召璘與車  
駕主事王韋屬以後事至不能語猶舉筆作國恩未  
報親養未終八字泣數行下無一語及其家事亦  
養堅定烏能至是哉

信其味



嘉議大夫南京吏部右侍郎贈南京禮部尚書

謚文修公文俊墓誌銘

費 案

公諱文俊字汝英別號方齋其先下邳郡人晉建興  
隨中宗渡江入閩僑晉安徙莆田居國清塘遂稱國  
清林氏傳至諱茶卿者爲公高祖茶卿生子子生個  
有詩名個生誥字廷諭號朴軒則公父也以公貴贈  
翰林院編修加贈朝議大夫南京國子監祭酒母張  
氏贈孺人加贈恭人胥有懿美是種子公公生而穎  
異過目成誦家貧無書日閱諸肆輒熟識以歸自爲  
諸生已知名正德丁卯鄉試發解第一辛未舉進士

選翰林庶吉士劬學攻文癸酉授編修僦室都下安  
澹素以養二親盡其懽乙亥秋張恭人卒庚辰秋朴  
軒翁卒皆自都奉覲南歸戚毀踰禮嘉靖癸未既合  
葬復之官預修武宗實錄充經筵展書官乙酉實  
錄成擢右春坊右贊善賜白金文綺丙戌進經筵講  
官正德庚辰同會試事己丑春復然尋主試武舉每  
精校閱不少自欺一時文武士彬彬入彀嘗以不能  
俯仰權貴幾擠外補賴受知皇上得免庚寅秋南  
京國子祭酒缺會推章四上竟及公始允公條教平  
實範人以身而人樂信從法行自貴游子於資叙井

并無所紊有生遇盜緩期法當贖金將鬻子公聞惻  
然捐助吏議卒免贖先是有旨命國子監校刊二十  
一史未就公至躬率諸生警校竄補恒至達曙不數  
月鐸梓上獻 聖心嘉悅每御文華殿指示元臣曰  
此祭酒林文俊所刊書也公嘗再疏乞休 上輒慰  
留有學行可取之褒壬辰改北祭 上執範益嚴而廢  
墜修舉仍充經筵講官時披珍賜癸巳三月 上再  
幸國學釋奠先師禮畢命師儒修坐講之禮公從容  
講說元首股肱明良之義溫厚和平天顏怡懌賜衣  
二襲甲午擢南京禮部侍郎七月會太廟災自劾求

退輒荷溫旨乙未改吏部屬家宰缺公視篆百爾明  
慎題奏精詳雖老於吏事者莫過也公諳五行家數  
年前嘗對予自言運行至戊不吉丙申六月初借予  
遇西華門復以爲言予每不然之公曰若見得破則  
百歲死與今日死同也乃月之二十九日太宰甘泉  
翁蒞任時公左脇病疽力疾出陪不敢廢禮於案所  
尊予怪其面色晦甚問而知之力勸臥攝數日造內  
視之迎笑曰前言驗矣吾卽死矣吾以布衣至此何  
恨哉予心知不可治而公已安於命亟送醫藥皆不  
受也越七月十二日卒痛哉享年僅五十訃聞上

加軫惜國典大臣非三載考滿不得蔭子不全給葬  
祭而謚贈又往往出自特恩公之爲侍郎也未及三  
載所司以請 上重念其講讀效勞有年特許蔭一  
子加贈南京禮部尚書賜祭葬兼錫之謚於是太常  
議謚曰良曰恪而 御筆特改曰文修蓋近代文臣  
所未有之異數也其始終荷知 聖明如此可謂難  
矣

南京吏部驗封清吏司郎中定山莊公景墓誌

銘

湛若水

先生諱景字孔陽號木齋江浦人卜築浦口清江建亭而東莞林緝熙適至扁曰臥林遂號臥林居士遷定山橋曰雙泉閣曰天風亭曰活水曰溪雲則又號定山居士四方人稱之亦曰定山先生本姓章氏宋丞相郇國得象之後子孫由閩越而浦城而松江至祖曰智甫者以儒術名洪武初不樂仕進逃名更姓莊氏游淮泗至江浦家焉父諱誦贈徵仕郎行人司左司副妣任氏贈太孺人配李氏封孺人先生生於

正統丁巳爲兒甚異十一歲充邑庠生十三補廩膳  
景泰丙子領鄉薦成化丙戌舉進士選庶吉士授翰  
林檢討風志慕古文尤奇偉與之交游者皆一時名  
儒如白沙陳先生一峰羅先生其尤者也 憲廟欲  
設上元鰲山燈先生同編修章公懋黃公仲昭上培  
養君德疏言甚剴切忤旨杖之調湖廣桂陽判行間  
用給事中毛弘御史陳壯言改南京行人司左司副  
迎二親就養尋遭二親丙申服闋不起復超然肥遁  
有示門人徐光岳無絃太極之詩巡撫都憲王公恕  
訪于定山欲以白金十五鎰理其故廬邵之曰受官

辦以理私廬可乎十九年癸卯正月白沙先生起取  
入京過定山相留越月送於揚州及南還復送之龍  
江關故白沙詩曰憶昔經江東多士予所欽論文一  
杯酒惟我與子斟豈意千載下復此聞韶音我病不  
出戶何時還盍簪俯仰宇宙間與子契其深或問張  
汝弼草書先生曰好到極處俗到極處問何如則可  
曰寫到好處變到拙處曰何居曰所謂行墨因調性  
者是已白沙先生亦曰定山草書迥然自成一家者  
也定山論詩文曰取乎內而忘乎外得之心而應之  
手如相馬之神非牝非牡如斲輪之巧不疾不徐斯



其至矣若夫優人之學孫叔敖抵掌談笑得其形似者奚可哉其持身則慕伊川法度斬然而難犯接人則慕明道和氣油然而可親嘗曰天之生聖賢將爲世道計也或裁成以制其過或輔相以補其不足孔子之於六經朱子之於傳註喚醒聵聵所以引其不及者至矣今世降風移學者執於見聞入耳出口至於沒溺而淪胥之者非制其過可乎故進而當行道也吾義所安不違道以干譽退而當明道也吾志所存亦不立異以求名弘治七年甲寅後軍都督府經歷周廣榮薦先生恬退自守極養有素乞起用 聖

旨曰取來用巡撫何公鑑躬詣定山勸駕繼遣應天府候行先是冢宰王公恕司寇張公瑄都憲虞公瑛侍郎朱公德提學王公鑑之知州萬公本諸薦此皆出部檄非特旨也故先生曰吾向以諫被謫旣而退處幾三十年矣今乃出特旨敢不行乎且學士丘瓊亭常嫉曰引天下士夫背朝廷者杲也吾當國必殺之丘今入閣矣承特召而不行罪其可道乎七月遂行九月入京朝見大學士徐公洵語郎中邵二泉寶曰定山亦我朝出色人當復翰林乃協輿情丘語人曰我不識所謂定山也徐公又語學士西崖李公東

陽曰定山君之故人君當注意我已致仕不能爲朝  
廷薦賢矣李但唯唯子會謂西涯初翁先生入京戲  
曰公今後能用大筆字作拜帖乎謁吏部三揖不跪  
家宰耿公裕起延之以茶令四司送出部門先生曰  
第令不失已官職外物耳吏部題復行人司副子介  
暨玉巴山弘謂西涯語吏部曰留都根本之地定山  
還當官此八月乙卯三月陞南京吏部驗封司郎中  
以八月到任十二日病中風疾遷延野寺瀕留日甚  
明年丙辰八月二十日赴通政司告行本部卽歸定  
山自是屢告部不爲題處時瓊臺丘公亦卒越明年

丁巳三月遇考察尚書清路倪公岳以老疾退之乃  
先生告去已改歲矣故白沙詩曰欲歸不歸何遲遲  
不是孤臣託疾時此是定山最高處江門漁父却能  
知或曰先生與白沙之詩可謂世稱兩絕者曰言語  
文字之學昔人謂落第二義矣江西張公東白元稹  
書曰獲親近作不勝仰慕向裏工夫惜不得聚首論  
之往年陳白沙會間當盡所言矣張公汝弼書曰君  
子居閒患無書可讀又恐書多而亡羊耳晦菴教萬  
世學者不得已有言亦爲魯齋所惜也先生之於白  
沙必有定論更一示我先生俱以白沙之說答之新

要進士汪君循從學亦首示以白沙之學循曰欲知  
先生之心者當觀先生之詩若觀先生之詩者亦可  
見先生之學甘泉子曰子癸丑下第南歸謁先生於  
定山潏然灑落望之知爲有德人也今觀先生及諸  
公之言卽先生之學宜與白沙先生同矣而白沙先  
生語我曰定山人品甚高恨不曾與我問學遂不深  
講不知其後問緝熙何以告之此猶若有未盡然者  
何耶或曰以講習不足以入道也故忘言以默識終  
默不可以示訓也故因詩以立言懼詩名之以召禍  
也故應詔以混世見世不可以久處也故在告以歸

山歸山不能以自潔也故委物而辱身乃先生超然  
而還大化矣或曰先生之出處進退未易言也其始  
也激之於瓊臺其中也乘之於西涯其終也成之於  
清谿而又悞於子弟門生之不力焉使瓊臺而無入  
相入相而先物故則先生退居三十年矣未必出出  
而有知己故人調護之以累薦之賢則必復內翰必  
不南及南而疾作不知人矣使子弟門生而力焉則  
必知今法不俱一狀而可掛衣長揖以去而必知自  
委知自委必不惟清谿之忍使清溪而不忍則自人  
月並明年二月知彼其久中間一念回榜之義全天

下之望必有以慮先生而不至從考察退也噫或曰  
先生既病風不知人其進退當是子弟主之也雖然  
昔者柳下惠爲士師三黜而不去蒧曰直道而事人  
令尹子文曰三仕三已而無喜愠色甯武子邦無道  
則愚古之賢聖人立身遇世其遠意豈常情所可測  
哉十二年己未九月疾大作二十九日終於正寢十  
二月二十日葬定山之原其明年庚申邑尹胡君昉  
請祀于鄉祠子男五曰會曰全曰介曰全曰侑

南京吏部驗封清吏司郎中少谷鄭公繼之墓

碑

林 鈺

鄭子少谷繼之氏諱善夫世居南湖岡大鄉聚代多  
顯者皆其族產獨鄭子結菴就賢劬誦今學賢者殊  
振絕也嘗誦曰墜道非時也萎儒與世靡視古太峻  
脆志以降其趨吾固疾學之不變果懇學十年反之  
古孝廟乙丑歲年二十一第進士正德改元纂修錄  
松常鎮實錄成隨繼居內外琅嶺六年起銓戶部主  
事出理滄市關譏鬪不敗名商人利之膺其能歷任  
也 武皇初赫炳中官鄭子善卦時嘆曰大丈夫當



龍皇於世退見無骭枉我志力告得請乃築少谷草堂於金螯峰作遲清亭俟天下之清交與鮮絕巖居六載正德十三年有司勸駕起奪其疾改禮部祠祭清吏司主事十四年轉本司署員外郎三載考績推恩父母如其官居禮部握蘭遠禮宗伯咸贊其文能秩相也是年三月武皇將南狩齋謀諸寮采曰駕未發諫之可絕否吾股肱何勸吏兵刑諸曹郎中黃鞏等若于人同伏跪於闕門跪惻切指斥嬖臣江彬及中官輩濁亂天下怒犯之武皇杖之闕下死者貶者落籍于民者有差旣南狩鄭子切告未得明年

錢至京師之館焉談畫時事曰天子何可爲計哉古  
云曙戒勿怠後稷逢殃吾胡可弗歸遂過浙山人孫  
一元太初死走道場山中哭之孰治喪事畢游越山  
水至逾八月旋閩居湖上一多病必滿時月間已必  
往佳山水游或憫其羸告之癖曰吾少谷靜中不留  
求佳突吾思耳益誇嚴云江南北山水畢受吾杖履  
之嘉靖改元以都御史周季鳳御史汪瑯薦起爲南  
京刑部郎中尋轉吏部驗封司至建健春武夷游值  
風雪肅理弗密以病病且依依不休其游至弗支強  
輿病歸歸二日不寐及歸已瀕留人意所豐裁鄭子

云請諸君勞苦少休少谷可以存神明晚與訣力于  
書使高激傳汝舟二子曰修身俟死吾今更復吳越  
詩文妻子付託高傳二弟經理其寄延平遺書皆如  
云乃啟手足以游歲癸未臘晦前二日周身與棺激  
與汝舟治也后發筭皆實實鄉人始駭發鄭子之貧  
士知賢鄭子能有道其官嗟夫財利者世不學皆能  
旨嗜之俗殉瘡厚間然曰居官必多得財故有道者  
雖親且惑况鄉人夫旃旃仁義何以破愚利固善昏  
世貪鹿視肉如鄭子者能居道也夫觀鄭子婚嫁七  
弟妹貨業皆其推與傭者磨之田令以完娶飾葬其

屬二十二人其治身嚴厚冲澹高潔求象其道於家  
國誰肯曰任重者身也途畏者口也致遠者道也邪  
行亡乎體違言不存口道可要諸遠矣寡交多親忠  
信則交慶其言吉乎鄭子蹈言今徵見之實完固以  
沛譽衆固稱少谷先生云計傳至者咸哀涕蓋惻賢  
者弗長世沒時年三十九益可哀夫葬事纖悉皆福  
州太守汪文盛少守陳綱二先生功德也二先生鄭  
子至友孤鳴梧少保孤恤亡鄭子知德於南賓制見  
友道叔世可興起矣墓在懷安西郊外梅亭山山旁  
諸達汪先生念口碑可世垂以章顯賢者云遷前室

妄入袁氏合縫遺言有二子求不累其托鄭子生成  
化已巳十一月二十日也論曰鄭子博學而能反之  
者也吾觀少谷子道論子通經世要談悠哉言乎大  
旨鬱然可觀其槩之正而已探其要本忠信成節則  
非繡言觀交際編及余居京師與游者盡海內名氏  
其志念深常有以自下故皆以道相膠漆孔子云斯  
焉取斯易曰同明相照同類相求雲從龍風從虎信  
夫短長名位君子何可論之

焦太史編輯國朝獻徵錄卷之二十七終